

U ovom broju, između ostalog, čitajte:

- **Poslodavci sa parlamentarcima iz SBK: Razmatrana inicijativa UPFBiH za donošenje i izmjenu zakonskih propisa**
- **Članovi UPFBiH zahtijevaju: Riješiti problem sa Hrvatskom ili će doći do blokade graničnih prijelaza**
- **Zajednička platforma UPFBiH i granskih sindikata realnog sektora će doprinijeti boljoj zaštiti prava radnika i stvaranju efikasnijeg poslovnog ambijenta**
- **UPFBiH traži produženje Upute o načinu realiziranja obustavljanja polazaka, povratka, odnosno voznih redova u uvjetima proglašene nesreće izazvane pandemijom korona virusa**
- **UPFBiH upozorilo na pogrešnu primjenu propisa od strane graničnih veterinarskih inspekcija u BiH prilikom uvoza i plasiranja na tržište proizvoda koji sadrže sastojke životinjskog porijekla namijenjenih ljudskoj konzumaciji**
- **UPFBiH traži izmjenu Pravilnika o primjeni zakona o porezu na dobit**
- **Održan sastanak Pravnog i Ekonomskog savjeta UPFBiH**





## **Poslodavci sa parlamentarcima iz SBK: Razmatrana inicijativa UPFBiH za donošenje i izmjenu zakonskih propisa**

### **Neophodno raditi na poboljšanju komunikacija predstavnik vlasti i poslovnog sektora**

U zgradi Vlade Srednjobosanskog kantona u Travniku 19. maja 2021. godine prvi put je organiziran sastanak privrednika, predstavnika Grupacije poslodavaca SBK pri UPFBiH i Udruženja poslodavaca FBiH s parlamentarcima sa ovog područja u oba doma Federalnog parlamenta, s ciljem lobiranja i osiguranja podrške reformskim zakonima koji godinama skupljaju prašinu.

Direktor Udruženja poslodavaca Federacije FBiH Mladen Pandurević predstavio je Inicijativu UPFBiH "20+5+6" za rasterećenje privrede i poboljšanje poslovnog ambijenta te analizu efekata povećanja minimalne neto plate u FBiH za koje se zalaže Udruženje.

"Potreban je zakon o minimalnoj plaći, jer kako su u nekim firmama plaćeni radnici to nije dostojno čovjeka, a također treba uvrstiti i zakone o doprinosima i porezima na plaće. Mislim da imamo isti cilj, a to je da što više ljudi ostane ovdje i da ne napuštaju zemlju zbog niskih plaća i nepostojanja radnih mjesta" kazala je član UO UPFBiH Snježana Koepruner.

Poslodavci su istaknuli i zakone o porezima i doprinosima na plaću te brojne nameti i prepreke sa kojima se suočava realni sektor koji, umjesto razvoja, sve češće razmišlja o smanjenju obima proizvodnje.

Premijer SBK Tahir Lendo kazao je kako očekuje da nakon današnjeg sastanka ponovno bude inicirano usvajanje zakona koji bi donijeli rasterećenje privrede.

"Želimo iz ovog kantona još jednom pokrenuti inicijativu prema Federaciji BiH, kako bi se ubrzalo donošenje reformskih zakona u privredi. Tu je inicijativa "20+5+6" koja predstavlja set novih zakona koje su predložili privrednici i mislim da proceduru treba pokrenuti" kazao je Lendo.



Zaključeno je da je neophodno raditi na poboljšanju komunikacija predstavnika vlasti i poslovnog sektora a kako bi se ojačala ekonomska aktivnost i napredak u ovom kantonu.

## **Poslodavci zahtijevaju: Riješiti problem sa Hrvatskom ili će doći do blokade graničnih prijelaza**

Udruženje poslodavaca FBiH uputilo je otvoreno pismo predsjedavajućem Vijeća ministara BiH Zoranu Tegeltiji, ministru vanjske trgovine i ekonomskih odnosa BiH Staši Košaracu, ministrici vanjskih poslova BiH Biseri Turković i šefu Delegacije EU u BiH Johannu Sattleru u vezi s primjenom Pravilnika o određivanju javnih cesta po kojima se mora odvijati tranzitni promet teretnih vozila kroz Republiku Hrvatsku.

U pismu se navodi da dosadašnje aktivnosti Vijeća ministara BiH i institucija Bosne i Hercegovine, a povodom aktuelnog gorućeg problema u vezi sa primjenom Pravilnika o određivanju javnih cesta po kojima se mora odvijati tranzitni promet teretnih vozila kroz R.

Hrvatsku (NN 51/2021, 12.05.2021.), prema informacijama sa kojima raspolaže UPFBiH nisu dale nikakav rezultat.



Sterilne izjave predstavnika institucija Bosne i Hercegovine i dosadašnje aktivnosti Vijeća ministara BiH i državnih institucija u rješavanju ovog problema nisu adekvatne težini problema sa kojim se suočila Bosna i Hercegovina i bh. privrednici. Težina problema zahtjeva adekvatan odgovor i da se pitanje momentalno riješi.

Udruženje poslodavaca FBiH zahtjeva:

- od Vijeća Ministara BiH i institucija Bosne i Hercegovine da ovo pitanje riješi u roku od 48 sati, u suprotnom će privrednici blokirati sve granične prijelaze između BiH i R. Hrvatske i za odvijanje teretnog i putničkog saobraćaja;
- da se u rješavanje pitanja uključi i delegacija Europske unije u BiH, jer je ovakvom Odlukom došlo do kršenja Protokola 3. o kopnenom prijevozu Sporazuma o stabilizaciji i pridruživanju između BiH i Europske unije, od strane Republike Hrvatske koja je članica Europske Unije;
- momentalno otvaranje graničnih prelaza koji su definisani u Ugovoru o graničnim prelazima jer međunarodni ugovori imaju primat u odnosu na domaće propise.

Imajući u vidu da je između Republike Hrvatske i Bosne i Hercegovine potpisan bilateralni ugovor o graničnim prijelazima, a isti nije otkazan niti izmijenjen, Republika Hrvatska je



shodno Sporazumu o stabilizaciji i pridruživanju morala poštivati navedeni validni ugovor.

Ovim ugovorom određeni su granični prelazi. Prema članu 1. tačka c) Ugovora određeni su ostali granični prijelazi za međunarodni promet putnika i roba. Pod tačkom (i) tačke c) kao granični prijelazi za cestovni promet putnika i roba Republika Hrvatska i Bosna i Hercegovina su utvrdile sljedeće GP: GP Maljevac – Velika Kladaša, Gunja – Brčko, Strmica – Strmica i Vinjani Gornji - Osoje.

Shodno navedenom nisu tačne tvrdnje Ministarstva mora, prometa i infrastrukture Republike Hrvatske da navedenim pravilnikom nije ukinuto dosadašnje rute za teretni tranzitni promet između Republike Hrvatske i Bosne i Hercegovine.

UPFBiH napominje da se granični prijelaz za cestovni transport, odnosno rute za teretni tranzitni promet između Republike Hrvatske i Bosne i Hercegovine shodno zakonodavstvu i standardima EU ne mogu utvrđivati jednostranom odlukom. To potvrđuje i činjenica da iz Ministarstva tvrde da je na graničnom prijelazu Brčko- Gunja teretni promet zbog starosti i dotrajalosti mosta preko rijeke Save prekinut prije više od dvije godine na inicijativu Bosne i Hercegovine. Dakle, ovakva pitanja se uređuju zajedničkim dogovorima.

UPFBiH vjeruje da je najbolji put za rješavanje ovog pitanja diplomatski dogovor između nadležnih institucije Bosne i Hercegovine i Republike Hrvatske uz pomoć delegacije Europske unije, a u cilju dobrosusjedskih odnosa i poštivanja međunarodnih ugovora, iako potez hrvatskih vlasti nije dobrosusjedski.

Republika Hrvatska ne može svojim internim aktima rješavati ovo pitanje i kršiti međunarodne Ugovore, već je to pitanje koje se uređuje u okviru bilateralnih pregovora.

Udruženje poslodavaca FBiH zahtjeva od institucija Bosne i Hercegovine da ukoliko se ovo pitanje ne riješi diplomatskim putem, odmah pristupe uvođenju recipročnih mjera na način da se zabrani transport roba na graničnim prijelazima tamo gdje je od važnosti za Hrvatsku.


## Socijalni dijalog najbolje rješenje za regulisanje međusobnih odnosa

### Udruženje poslodavaca će izaći sa prijedlogom teksta zajedničke platforme UPFBiH i sindikata



Kolektivni ugovor o pravima i obavezama poslodavaca i radnika za djelatnost proizvodnje i prerade metala u FBiH i minimalna plaća bili su tema sastanka rukovodstva Udruženja poslodavaca FBiH na čelu s predsjednikom Adnanom Smalbegovićem i direktorom Mladenom Pandurevićem sa predsjednikom resornog granskog sindikata Bajrom Melezom i njegovim saradnicima Vahidom Ramićem i Almirom Salihovićem.

Sastanak je upriličen u kontekstu izraženih složenih uslova privređivanja sa ciljem da se putem sličnih sastanaka sa ostalim resornim granskim sindikatima iz realnog sektora iznađu najoptimalnija rješenja za poboljšanje općih uslova rada i poslovanje. Stoga je zaključeno da će se u narednih 15 dana održati sastanak Udruženja poslodavaca FBiH i predstavnika granskih sindikata iz realnog sektora na kojem će se razgovarati o unapređenju socijalnog dijaloga, otpočinjanju kolektivnog pregovaranja i minimalnoj plaći.



Nakon planiranih sastanaka, Udruženje poslodavaca će izaći sa prijedlogom teksta zajedničke platforme UPFBiH i pomenutih sindikata, koja treba biti usvojena na navedenom sastanku a koja će poslužiti kao osnov za vođenje socijalnog dijaloga i zajednički nastup prema institucijama vlasti.

Što se tiče minimalne plaće, postignut je konsenzus da se ona utvrdi a njeno usklađivanje vrši na osnovu metodologije koja se mora zasnivati na Konvenciji Međunarodne organizacije rada broj 131 o minimalnoj plaći, da ona mora zadovoljiti minimum socijalnih potreba radnika i njihovih porodica, te da ne smije negativno uticati na održavanje postignutog nivoa zaposlenosti i ekonomski rast.

## **Zajednička platforma UPFBiH i granskih sindikata realnog sektora će doprinijeti boljoj zaštiti prava radnika i stvaranju efikasnijeg poslovnog ambijenta**

### **Platforma je osnova za uspostavljanje stalne koordinacije aktivnosti između Udruženja poslodavaca FBiH i granskih sindikata realnog sektora**

Zajednička platformom za vođenje socijalnog dijaloga koju je ponudilo Udruženje poslodavaca FBiH bit će potpisana narednih dana, zaključak je sastanak održanom 01. juna 2021. godine kojem su prisustvovali predsjednici Sindikata metalaca FBiH, Samostalnog sindikata šumarstva, prerade drveta i papira BiH, Sindikata građevinarstva i industrije građevinskog materijala BiH, Samostalnog sindikata radnika hemije i nemetala u FBiH, Sindikata tekstila, kože, obuće i gume FBiH, kao i rukovodstva UPFBiH na čelu sa predsjednikom Adnanom Smailbegovićem, direktorom Mladenom Pandurevićem i članom Izvršnog odbora Snježanom Koepruner.

Socijalni partneri su saglasni da je neophodno raditi na izgradnji i očuvanju međusobnog povjerenja, te će platforma poslužiti kao osnova za vođenje socijalnog dijalog i zajednički nastup

prema institucijama vlasti u svim oblastima gdje postoji obostrani interes.



Platforma će se potpisati najkasnije do 10. juna nakon čega će se pristupiti kolektivnom pregovaranju, koordinaciji aktivnosti u Ekonomsko-socijalnom vijeću FBiH, otpočeti pregovori o minimalnoj plaći i dogovoriti zajednički nastup ka institucijama vlasti.

Platforma je osnova za uspostavljanje stalne koordinacije aktivnosti između Udruženja poslodavaca FBiH i granskih sindikata realnog sektora te je otvorena za pristupanje i drugih granskih sindikata.

## **Održan okrugli sto - Izrada prijedloga zakona o poticanju razvoja male privrede u Federaciji BiH**

Federalni ministar razvoja, poduzetništva i obrta Amir Zukić danas je na okruglom stolu Izrada prijedloga zakona o poticanju razvoja male privrede u Federaciji BiH” s predstavnicima Privredne komore FBiH, Obrtničke komore FBiH i Udruženja poslodavaca FBiH zaključio da će predloženi Zakon o poticanju razvoja male privrede u Federaciji donijeti više sredstava poduzetnicima za realizaciju njihovih projekata.

Ministar razvoja poduzetništva i obrta FBiH Amir Zukić kazao je kako su na okruglom stolu



pokušali sublimirati javnu raspravu koja je obavljena u prethodnih 90 dana, u vezi donošenja novog zakona o poticanju razvoja malog poduzetništva, prije svega jer je potrebno isti usuglasiti sa standardima Evropske unije. Zukić navodi kako su i iskustva pokazala da je potrebno uraditi poboljšanja.



Dodao je kako se to prije svega odnosi na sredstva koja trebaju biti izdvojena iz budžeta FBiH za razvoj malog i srednjeg biznisa, a istovremeno procesi i procedure u vezi tih ulaganja bi trebale biti znatno transparentnije i efikasnije u smislu povećanog broja zaposlenih i uticaja na konkurentnost malih i srednjih preduzeća i obrta.

"Mislim da smo došli do teksta zakona koji unosi dosta novina. Osim veće mase sredstava i bolje uređenosti procesa implementiranja tih sredstava, vrlo važna novina je uvođenje Savjeta za poticanje razvoja malog i srednjeg poduzetništva, gdje je predviđeno da pored predstavnika ministarstava koja se bave privredom ili djelatnostima koje mogu uticati na privredu, bit će uključena i Privredna komora Federacije BiH, Obrtnička komora i Udruženje poslodavaca tako da će Vlada dobiti jedno novo savjetodavno tijelo koje će pratiti aktivnosti Vlade i sugerisati određene aktivnosti, bilo da se radi o programskim, bilo o potrebi za promjene zakona", rekao je Zukić.

Nada se da će zakon koji se nalazi u finalnoj fazi usvajanja biti usvojen i da neće biti "žrtva određenih komplikacija vezanih za političku situaciju".

”Ovo je jedan zakon koji treba da stvori bolje poslovno okruženje i da stvori pretpostavke da FBiH znatno više i kvalitetnije pomogne sektoru malih i srednjih preduzeća u njihovim pokušajima da uspješno budu prisutni i na svjetskom i domaćem tržištu, te zaposle puno veći broj osoba, nego što zapošljavaju sada”, istakao je Zukić.

U ime Udruženja poslodavaca FBiH obratio se Husein Al-Baldawi koji je pozdravio sva nastojanja ministarstva u smislu unapređenja malih i srednjih preduzeća.

”Udruženje poslodavaca FBiH će svojim aktivnim angažmanom dati svoj doprinos u smislu dobivanja što kvalitetnijeg zakonskog rješenja i u tom smislu ćemo dati komentare i sugestije”, kazao je on.

Podsjetio je kako je ovaj sektor ranjiv, naročito u vrijeme pandemije koronavirusa zbog čega cijene svaki vid podrške.



Predsjednik Privredne komore FBiH Mirsad Jašarspahić kazao je kako je ovo odličan primjer kako donosioci odluka koristeći resurse poslovne zajednice mogu pripremiti kvalitetno zakonsko rješenje koje u budućnosti treba doprinijeti tome da što bolje bude potpomognut rad malih i srednjih preduzeća u FBiH.

Subjetti male privrede, kako je definisano u Nacrtu zakona, podijeljeni su u tri kategorije.

Mikro subjetti su fizičke i pravne osobe koje zapošljavaju prosječno godišnje manje od deset osoba i čiji je ukupni godišnji prihod ili ukupna vrijednost poslovne imovine na kraju poslovne godine manja od 3.911.600 KM.

Mali subjekti zapošljavaju prosječno godišnje manje od 50 osoba, a njihov ukupni godišnji prihod ili ukupna vrijednost poslovne imovine na kraju poslovne godine su manji od 19.558.000 KM.


U kategoriju srednjih subjekata spadaju fizičke i pravne osobe koje zapošljavaju prosječno godišnje manje od 250 osoba i čiji je ukupni godišnji prihod manji od 97.790.000 KM ili čija je ukupna vrijednost poslovne imovine na kraju poslovne godine manja od 84.099.400 KM.



Novi zakon predviđa i donošenje Strategije razvoja male privrede u

F BiH kao sveobuhvatanog dokumenta sa osnovnim ciljevima, mjerama i nosiocima dugoročnog razvoja male privrede. Na osnovu Strategije i trogodišnjeg Akcionog plana za njenu provedbu, te u skladu sa analizom stanja u oblasti male privrede, Federalno ministarstvo razvoja, poduzetništva i obrta predlaže, a Vlada FBiH usvaja Program poticaja za razvoj male privrede u FBiH za svaku kalendarsku godinu najkasnije do 31. januara tekuće godine.

Jedno od zakonskih rješenja je i to da resorni federalni ministar osniva Vijeće za poticanje razvoja male privrede kao savjetodavno tijelo Federalnog ministarstva. Vijeće se sastoji od četiri predstavnika, od kojih po jednog kandiduju Privredna komora FBiH, Obrtnička komora FBiH, Udruženje poslodavaca FBiH, te Savez općina i gradova FBiH. Precizirano je da članovi vijeća ne primaju naknadu za svoj rad.



## **UPFBiH traži produženje Upute o načinu realiziranja obustavljanja polazaka, povrataka, odnosno voznih redova u uvjetima proglašene nesreće izazvane pandemijom korona virusa**

Ministarstvo prometa i komunikacija FBiH raspisalo je Javni oglas o pokretanju postupka privremenog obustavljanja održavanja pojedinog polaska, odnosno povratka ili reda vožnje u FBiH i donijelo Uputu o načinu realiziranja obustavljanja polazaka, povrataka, odnosno voznih redova, u uvjetima proglašene nesreće izazvane pandemijom korona virusa (COVID-19) i etapnog početka održavanja javnog linijskog prijevoza putnika.

Prijevoznicima je data mogućnost da privremeno obustave održavanje pojedinog polaska, odnosno povratka, ili voznog reda u cijelosti najduže do 31.12.2020. godine, a taj rok je produžen na 30.06.2021. godine donošenjem Izmjena i dopuna upute o načinu realiziranja obustavljanja polazaka, povrataka, odnosno voznih redova, u uvjetima proglašene nesreće izazvane pandemijom korona virusa (COVID-19) i etapnog početka održavanja javnog linijskog prijevoza putnika.

Obzirom da rok ističe naredni mjesec, Udruženje poslodavaca FBiH je pozivalo ministra prometa i komunikacija FBiH Denisa Lasića da donese izmjene i dopune Upute i blagovremeno produži rok do 31.12.2021. godine. Udruženje u dopisu upućenom ministru navodi da je potreba za produženjem roka sasvim opravdana, s obzirom da su i dalje na snazi mjere za sprečavanje širenja COVID-19 koje preporučuju smanjen obim kretanja građana, te da je ovaj prijedlog u skladu sa mjerama koje su na snazi u susjednim državama i pojedinim državama Europske unije.

Također se navodi da bi se produženjem roka u velikoj mjeri olakšalo prijevoznicima, čija je djelatnost zbog pojave COVID-19 znatno ugrožena i kojima je neovisno o njihovoj volji onemogućeno obavljanje pojedinog prijevoza.

**UPFBiH upozorilo na pogrešnu primjenu propisa od strane graničnih veterinarskih inspekcija u BiH prilikom uvoza i plasiranja na tržište proizvoda koji sadrže sastojke životinjskog porijekla namijenjenih ljudskoj konzumaciji**



Udruženje poslodavaca FBiH uputilo je dopis Ministarstvu vanjske trgovine i ekonomskih odnosa BiH, Uredu za veterinarstvo BiH i Agenciji za sigurnost hrane BiH kojim se upozorava na pogrešnu primjenu propisa od strane graničnih veterinarskih inspekcija u BiH.

Naime, Udruženju poslodavaca FBiH obratile su se članice iz oblasti trgovine i distribucije, sa zahtjevom za rješavanje problema sa kojim se susreću prilikom uvoza i plasiranja na tržište proizvoda koji sadrže sastojke životinjskog porijekla namijenjenih ljudskoj konzumaciji kao i proizvode za ishranu kućnih ljubimaca i to pod vlastitim robnim markama koje za njih proizvode brojni proizvođači.

Uvoz navedenih proizvoda se zabranjuje zbog tumačenja koje je dato od strane Agencije za sigurnost hrane BiH:

- Stav graničnih veterinarskih inspektora je da svi proizvodi mogu biti uvezeni samo deklarirani i to sa svim podacima koje inspekcija traži. Dakle, prije nego se uvezu u BiH na proizvodima moraju postojati deklaracija o svim informacije koje zahtjeva inspekcija prilikom uvoza.
- Inspekcije uslovljavaju da pored originalne EU deklaracije na kojoj je navedena kompanija uvoznik kao proizvođač (što je prihvatljivo u svim državama EU), da kompanije na proizvodima navode: "za kompaniju proizvodi: navod kompanije proizvođača...", odnosno da se tačno naznači naziv proizvođača bez obzira što je na proizvodu uvoznik naveden kao proizvođač.


Udruženje napominje da su kompanije do prije nekoliko mjeseci uvozile ovakve artikle bez problema, uz odgovarajuće anekse koji moraju pratiti uvoz kao i veterinarsku kontrolu. Deklarisanje proizvoda su vršili u distribucijskim centrima u BiH, prije puštanja u prodaju. Međutim, bez obzira što u međuvremenu nije bilo izmjena zakona i podzakonskih akata koji uređuju ovu oblast, inspektori sada ne dozvoljavaju da takva roba bude uvezena i da se deklariraju u distributivnim centrima.

Ovakav način kontrole od strane veterinarskih inspektora nije racionalno rješenje niti se ovim mjerama postiže cilj zaštite potrošača i sigurnosti hrane. Upravo suprotno, ovakvim ponašanjem stvaraju se samo dodatni troškovi kompanijama i onemogućava se slobodan protok roba i usluga, a u potpunoj suprotnosti su sa zakonima i podzakonskim aktima u BiH koji definišu ovu oblast, rješenjima koja poznaju države u okruženju i države EU, te sa Uredbom (EU) br. 1169/2011 Evropskog parlamenta i Vijeća.

Ne samo da se krše domaći propisi i postupa suprotno Uredbi EU, na ovaj način ograničava se slobodno kretanje roba koje je jedno od temeljnih načela Ugovora EU i krši osnovna sloboda jedinstvenog tržišta koje je zagarantovana Ustavom BiH. Shodno navedenom, Udruženje u dopisu traži izdavanje Uputstva veterinarskim inspekcijama da postupaju u skladu sa propisima u BiH prilikom uvoza i deklarisanja proizvoda koji sadrže sastojke životinjskog porijekla namijenjenih ljudskoj konzumaciji kao i proizvode za ishranu kućnih ljubimaca.

## **UPFBiH traži uvrštavanje Prijedloga zakona o građevinskom zemljištu FBiH na prvoj narednoj sjednici ESV-a**


**UPFBiH zahtjeva hitno donošenje Zakona o građevinskom zemljištu koje treba riješiti pitanje upravljanja i raspolaganja gradskim građevinskim zemljištem**



Udruženje poslodavaca u Federaciji Bosne i Hercegovine zahtjeva hitno donošenje Zakona o građevinskom zemljištu u FBiH koje treba riješiti pitanje upravljanja i raspolaganja gradskim građevinskim zemljištem.

S tim u vezi, Udruženje poslodavaca UPFBiH uputilo je zahtjev ESV-u FBiH za uvrštavanje teksta prijedloga pomenutog zakona na prvu narednu sjednicu ESV-a. O nacrtu ovog zakona održana je javna rasprava, a nacrt je usvojen od strane oba Doma Parlamenta FBiH.

Donošenje zakona o građevinskom zemljištu je od izuzetne važnosti ne samo za razvoj lokalnih zajednica već i za poslodavce i privlačenje stranih investitora u ulaganje u lokalne zajednice. Zbog njegove važnosti u toku procedure pripreme i donošenja novog zakona, potrebno je da



tekst zakona razmotri Ekonomsko-socijalno vijeće FBiH te da u cilju donošenja kvalitetnih rješenja ovo tijelo iskaže svoje mišljenje i primjedbe.

Udruženje podsjeća da je još uvijek djelimično važeći Zakon o građevinskom zemljištu FBiH (Službene novine Federacije BiH, br.25/03, 16/04 i 67/05) koji je donio Visoki predstavnik i koji je usvojio Parlament Federacije BiH, u pojedinim odredbama u potpunosti koliziji sa Zakonom o stvarnim pravima (Službene novine Federacije BiH, br.66/13 i 100/13), koji se počeo primjenjivati 2014. godine. Zakonom o stvarnim pravima utvrđeno je da će se propisi o građevinskom zemljištu usaglasiti s odredbama tog zakona u roku od tri mjeseca od dana početka njegove primjene, tako da jedan od razloga za donošenje ovog novog Zakona o građevinskom zemljištu u Federaciji BiH proizilazi iz odredbe općeg propisa u oblasti stvarnih prava.

Zbog kolizije odredbi Zakona o stvarnim pravima i Zakona o građevinskom zemljištu u pogledu upravljanja i raspolaganja gradskim građevinskim zemljištem, koji je veoma bitan, ako ne i najvažniji resurs razvoja jedinica lokalne samouprave na području Federacije Bosne i Hercegovine, nastaju blokade razvoja, kako samih jedinica lokalne samouprave, tako i privrednika i poslodavaca.

Bez donošenja Zakona o građevinskom zemljištu, jedinice lokalne samouprave nisu u mogućnosti realizirati važeće regulacione planove zbog činjenice da se u području gradskog građevinskog zemljišta znatan dio tog zemljišta vodi u zemljišnim knjigama kao općenarodna imovina, društvena svojina i sl., a što direktno utiče na mogućnost investicija i razvoja općina i gradova kao i privlačenja stranih investitora.

U cilju poboljšanja teksta, ESV-u su dostavljene i primjedbe UPFBiH u formi amandmana na tekst Nacrta zakona o građevinskom zemljištu.



## UPFBiH traži izmjenu Pravilnika o primjeni zakona o porezu na dobit

### UPFBiH zahtjeva hitno donošenje Zakona o građevinskom zemljištu koje treba riješiti pitanje upravljanja i raspolaganja gradskim građevinskim zemljištem




Inicijativa za donošenje Pravilnika o izmjeni Pravilnika o primjeni zakona o porezu na dobit upućena je Ministarstvu finansija FBiH i Ekonomsko-socijalnom vijeću za teritoriju FBiH.

Članom 42. stav 4. pomenutog pravilnika propisana je mogućnost porezne posljedice korištenja nižih stopa amortizacije od stopa iz člana 19. Zakona o porezu na dobit, odnosno propisano je da ako porezni obaveznik koristi niže stope amortizacije od stopa iz člana 19. stav 2. Zakona, ima pravo (ne i obavezu) da smanji poreznu osnovicu za razliku između pune porezno dozvoljene amortizacije koja se utvrđuje prema Zakonu i stvarne (niže) amortizacije koja je utvrđena u njegovim poslovnim knjigama, prilikom utvrđivanja porezne osnovice. Prijenos privremenih razlika nije dozvoljen.

Udruženje u inicijativi traži da se ovaj stav izmijeni na način da se briše rečenica "Prijenos privremenih razlika nije dozvoljen" jer pomenuti stav nije u skladu sa članom 2. Zakona o računovodstvu i reviziji u FBiH koji propisuje obaveznu primjenu Međunarodnih računovodstvenih standarda (MRS).

Inicijativu Udruženje pogledajte [OVDJE](#).


## Održan sastanak Pravnog i Ekonomskog savjeta UPFBiH



Članovi Pravnog i Ekonomskog savjeta Udruženja poslodavaca održali su sastanak 26. maja 2021. godine na kojem su raspravljali o

inicijativi za donošenje Pravilnika o izmjeni Pravilnika o primjeni zakona o porezu na dobit, razmatrali mišljenja Federalnog ministarstva finansija u vezi sa primjenom Zakona o računovodstvu i reviziji, kao i problem zabrane uvoza proizvoda koji sadrže sastojke životinjskog porijekla, namijenjenih ljudskoj konzumaciji kao i proizvoda za ishranu kućnih ljubimaca, te primili k znanju informaciju o donošenju novog Zakona o akcizama BiH.

Udruženje je pokrenulo inicijativu za donošenje Pravilnika o izmjeni pravilnika o primjeni zakona o porezu na dobit. Članom 42. stav 4. pomenutog pravilnika propisana je mogućnost i porezne posljedice korištenja nižih stopa amortizacije od stopa iz člana 19. Zakona o porezu na dobit, odnosno propisano je da ako porezni obaveznik koristi niže stope amortizacije od stopa iz člana 19. stav 2. Zakona, ima pravo (ne i obavezu) da smanji poreznu osnovicu za razliku između pune porezno dozvoljene amortizacije koja se utvrđuje prema Zakonu i stvarne (niže) amortizacije koja je utvrđena u njegovim poslovnim knjigama, prilikom utvrđivanja porezne osnovice. Prijenos privremenih razlika nije dozvoljen. U inicijativi je predložena izmjena stava 4., na način da se briše rečenica "Prijenos privremenih razlika nije dozvoljen" jer pomenuti stav nije u skladu sa članom 2. Zakona o računovodstvu i reviziji u FBiH koji propisuje obaveznu primjenu Međunarodnih računovodstvenih standarda (MRS). Inicijativa je jednoglasno podržana te je istaknuto da treba insistirati na usvajanju ove izmjene jer zbog trenutnog rješenja postoji opasnost da jedan dio stvarne amortizacije bude porezno nepriznat i da obaveznik uslijed toga plati više poreza na dobit nego što bi ga trebalo. S druge strane,



trenutnim rješenjem nanosi se direktna šteta javnim prihodima. Ovakvim pristupom koji je u suprotnosti s fiskalnim pravilima u svijetu, primoravaju se obaveznici poreza na dobit da u prvim godinama plaćaju manje, a tek u kasnijim godinama više poreza na dobit, što po teoriji vremenske vrijednosti novca ide direktno na štetu javnih prihoda, jer se porez na dobit naplaćuje sporije, odnosno kasnije.

Nadalje, članovi su raspravljali o mišljenju Federalnog ministarstva finansija u vezi sa primjenom Zakona o računovodstvu i reviziji a koji se odnosi na pitanja pružanje računovodstvenih usluga. Zaključeno je da će se u narednom periodu uputi dopis za sastanak predstavnika Udruženja poslodavaca FBiH, Vijeća stranih investitora i Federalnog ministarstva finansija na kojem će se razgovarati o pomenutom mišljenju i Pravilnika o sadržaju i načinu vođenja registra kvalificiranih lica i registara pravnih lica i poduzetnika koji pružaju knjigovodstvene i računovodstvene usluge FBiH.

Članovi su podržali i inicijativu da se uputi dopis Agenciji za sigurnost hrane BiH, Ministarstvu vanjske trgovine i ekonomskih odnosa BiH i Uredu za veterinarstvo BiH u kojem će se ukazati na pogrešnu primjenu propisa od strane graničnih veterinarskih inspekcija u BiH. Zbog tumačenja koje je dato od strane Agencije za sigurnost hrane BiH članicama se zabranjuje uvoz proizvoda koji sadrže sastojke životinjskog porijekla, namijenjenih ljudskoj konzumaciji kao i proizvode za ishranu kućnih ljubimaca. U dopisu će se zatražiti da Agencija za sigurnost hrane BiH u okviru svojih nadležnosti poduzme sve aktivnosti u cilju hitnog rješavanja problema koji su nastali zbog pogrešnog tumačenja propisa. Također, zatražit će se izdavanje Uputstva veterinarskim inspekcijama da postupaju u skladu sa propisima u BiH prilikom uvoza i deklarisanja proizvoda koji sadrže sastojke životinjskog porijekla namijenjenih ljudskoj konzumaciji kao i proizvode za ishranu kućnih ljubimaca.

UPFBiH je informisalo prisutne članove da Uprava za indirektno oporezivanje priprema novi Zakon o akcizama BiH do čijeg teksta će UPFBiH uskoro doći. Članice su podržale aktivnost UPFBiH i istakle da je veoma bitno doći do teksta Zakona kako bi se na vrijeme reagovalo.

Na sastanku se razgovaralo i o Prijedlogu zakona o izmjenama i dopunama zakona o Poreznoj upravi FBiH koji je utvrdila Vlada FBiH. Članicama je ostavljen rok za dostavu komentara i primjedbi na isti, nakon čega će UPFBiH pripremiti amandmane i dostaviti nadležnim organima.

## Poziv za prijavu na obuku po projektu "Stručno osposobljavanje i zapošljavanje u tekstilnoj industriji"

Poziv za prijavu na obuku po projektu "Stručno osposobljavanje i zapošljavanje u tekstilnoj industriji"

Udruženje poslodavaca provodi projekat „Stručno osposobljavanje i zapošljavanje nezaposlenih mladih i žena u tekstilnoj industriji“, s ciljem stručnog osposobljavanja polaznika za zanimanje krojač/šivač i montažer u proizvodnji obuće s mogućnošću zapošljavanja nakon završene obuke.



Izvršena je selekcija polaznika koji će obuku provoditi u kompanijama Makama d.o.o. i Positive group d.o.o. iz Bugojna i Texteam d.o.o. iz Visokog.

Udruženje poslodavaca FBiH, u želji da proširi projektne aktivnosti, obavještava da će se stručna obuka polaznika s mogućnošću zapošljavanja vršiti i u kompanijama Sin-cro-er d.o.o. Čapljina i Torre Nova d.o.o. Gradačac. Obuka u ovim kompanijama vršiti će se isključivo za krojače/šivače.

Polaznicima će prije same praktične obuke u trajanju od tri mjeseca biti omogućena i teoretska nastava u trajanju od 15 dana. Teoretska nastava će biti organizovana online putem Zoom aplikacije. Tokom obuke, polaznicima će biti obezbijeđeni troškovi prevoza, obavezno osiguranje i ishrana.

## Udruženje poslodavaca Kantona Sarajevo i Ured za borbu protiv korupcije i upravljanje kvalitetom dogovorili saradnju u borbi protiv korupcije

Sastanak predstavnika Udruženja poslodavaca Kantona Sarajevo i Ureda za borbu protiv korupcije i upravljanje kvalitetom KS održan je 05. maja 2021. godine, a razgovarano je o problemima izazvanim



korupcijom koja nagrizava temelje bh. društva i ugrožava poslovanje velikog broja privrednih subjekata.

Predstavnici Udruženja poslodavaca ukazali su na značaj formiranja Ureda te istome daju punu podršku u borbi protiv korupcije. Izrazili su uvjerenje da Ured neće postati još jedan administrativni i otuđeni birokratski aparat te iskazali očekivanja da će Ured ostati nezavisno stručno tijelo sa tačno definiranim djelokrugom djelovanja. Istaknuli su da je korupcija prisutna u svim sferama djelovanja a posebno u postupku izdavanja građevinskih dozvola za gradnju poslovnih i drugih objekata, kao i izdavanje upotrebne dozvole, provođenju tendera za dodjelu javnih i drugih radova u nadležnosti općina, kantona i Federacije BiH, prijemu u radni odnos u državnim službama i javnom sektoru, te tokom provođenja inspeksijskog nadzora.

"Ured za borbu protiv korupcije i upravljanje kvalitetom pozdravlja nastojanje Udruženja poslodavaca KS da se aktivno uključi u borbu protiv ovog gorećeg problema te predlažemo da Udruženje delegira svoje predstavnike u proces izrade Strategije za borbu protiv korupcije Kantona Sarajevo i da se aktivno uključi u proces izrade antikoruptivnih zakona", kazao je šef Ureda za borbu protiv korupcije i upravljanje kvalitetom Erduan Kafedžić.



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**